

Seaskak manifestaldia antolatuko du Baionan, ikastolen garapenaren alde

Hezkuntza Ministerioaren jokamoldea salatuko du karrikan maiatzaren 30ean

Ikastoletako guraso, langile eta adiskide guztiei dei egin die Seaskak datorren larunbaterako antolatua den manifestaldian parte hartzeko. Hezkuntza Ministerioak ikastola sarearen garapena trabatzeko duen jokaera salatuko dute Baionako karriketan.

Lutxi Fourcade / Baiona

SEASKAK, Ipar Euskal Herriko ikastolen federazioak, manifestaldia antolatuko du datorren larunbaterako Baionan. Ikastolen sarea garatzeko Hezkuntza Ministerioaren borondate eskasa aldarrikatzeaz gain, Bordeleko Errektoretxearen jokaera salatuko du jendaurrean Seaskak. Izan ere, nahiz eta ikastoletako ikasle kopurua goratu, errektoreak ukatu ditu datorren sartzerako federazioak funtsezkotzat jo zituen ahal berriak.

Hezkuntza Ministerioak hartu erabakiek lehen mailetan zein bigarren mailan ondorio latzak ekar ditzaketela salatu zuen Seaskako zuzendaritzak. Lehen mailari dagokionez, lehen mailako ikastoletako ikasle kopurua 50 ikaslez emandutako da 1998ko sartzearan. Alta bada, lanpostu bat baizik ez du onartu Akademiako ikuskatzaileak. Ondorioz, federazioak proposatu zuen gela elebidun berri batzuen irekitzea ukatua izan da, hala nola Hendaian, Donibane-Lohizunen, Kanbon, Hazparnen eta Orreaga. Are gehiago, ikastolatan frantses irakaskuntzarako bideratu hezkuntza sistema Hezkunde Nazionalak zalantzan ezartzen duela gehitu zuen federazioak. Ikasle talde txikiak direla aitzakiatzat hartuz, frantses irakasle postuen hersteak



Iazko maiatzean Baionan izandako manifestazioa.

ARTXIBOKOA

aurreikusten ditu Ikuskaritzak ondoko ikastoletan: Hendaia, Miarrizte, Amikuze, Garazi, Orreaga, Sohuta, Kanbo eta Senpere. Era berean, ikasle kopuruaren ahultasuna ere azpimarratu du hainbat ama ikastolen iraupenari buruzko dudak adierazteko: Oztibarre, Azkaine, Sara eta Atharratze.

Bigarren mailari dagokionez, errektoreak ez du onartu ikastola kolegioaren irekitzea kostaldetan. Seigarreneko eta bosgarreneko 120 ikasleak kostaldetan bizi dira eta, Kanboko kolegioaz gain, Seaskak nahi luke bigarren kolegioa ireki kostaldetan. Aterabide egokiena zen lehen mailetako ikasleek beren eskolatze bidea ikastolan jar dezaten. Hezkuntza Ministerioak eskubide hori

ukatu dio, ordea, Seaska ikastolari.

Borrokatzen jarraitzeko asmoa

Errektoretxearen jokaera jendaurrean salatuz, ikastolen alde antolatua den manifestaldirako deialdia egin du Seaskak. Hiru eskakizun aldarrikatuko ditu karrikan. Lehénbizi, ahalbidetako eskatuko ditu lehen mailako ikastolek hedatzeko eskubidea izan dezaten eta ikastolaren bidez ele biko eredu pedagogikoa hautatu duten familien ikasle guztiak onar ditzaten. Bigarrenik, Hezkuntza Ministerioak 1994an onetsi hezkuntza sistema errespetatzen dadin galdegina du, batez ere frantses irakaskuntzari begira. Azkenean, ahalbidetako eskatuko ditu kolegioko

ikasleek eskolatze bidea jarraitzeko aukera izan dezaten etxetik hurbil den ikastola batean.

«Ez dugu sekula onartuko ikastolaren eredu pedagogikoa gaur egungo bazterte egoeran atxikia izan dadin; gurasoen galdetari erantzun behar dugu», azpimarratu zuen Marijo Anetas, Seaskako lehendakaria. Egoera onartezintzat jo zuen, batez ere ikusiz Hezkuntza Ministerioak hitzeman zuela «gaur egungo gizarte eskaerari erantzun baten ekartzeko behar diren ahalak» emanen zituela. Seaskari baitezpadakoak zaizkion irakaskuntza ahalen onestea lortu arte, borrokatzen jarraituko duela gehitu zuen. Lehen hitzordu garrantzitsua izanen da, beraz, datorren larunbatean. X

«Soberan» diren haurrak beste ikastetxeetara bidali nahi ditu Hezkuntza Sailak

■ Proposamen hori zaharra dela eta euskararen kontrako eraso berretsi egiten duela dio Sortzen-ek

Erredakzioa / Iruñea

EUSKAL irakaskuntza publiko berriaren aldeko plataformak, Sortzen-ek, «ikasle euskaldunekin merkataritza iluna egitea» egotzi zion Nafarroako Gobernuko Hezkuntza Departamentuari, eta salaketari hori plazaratzeko protesta eginen du bihar Sail horren egoitzaren parean, EILAS, LAB eta ELA sindikatuak ordezkariekin batera. Hezkuntza Sailak, dei horri aurre eginez, ohar bat kaleratu zuen atzo «Iruñerrian D ereduan matrikulatu diren ikasle guztiek lekua» izanen dutela iragarrit. Horretarako auzo bakoitzean «soberan» dauden matrikula eskaerak beste auzo bateko ikastetxera bidera daitezela proposatu du. «Hau dagoeneko kontu zaharra da, eta euskararen kontrako eraso berretsi egiten du», Rikardo Ederra Sortzen-eko kidearen hitzetan. «Badirudi ikastetxe publiko batean D ereduan matrikulatzen denak oztopak besterik ez dituela jasotzen Gobernuaren aldetik». Horregatik, Sortzen-ek tinko dirau bihar 13:30etan Hezkuntza Departamentuaren aitzinean egindako protesta deiarekin.

Iruñeko Alde Zaharreko San Francisco eskolatan 27 haurrek egin dute aurrematrikula D ereduan, 30ek Arrotxapea auzoko ikastetxean eta 28k Atarrabiako Lorenzo Goikoan. Hezkuntza Sailak gela bakoitzean gehienez 25 haur bil daitezkeela argudiatu eta «soberan» dauden ikasleak beste auzo batzuetara joan daitezela proposatu du berriz ere: San Francisco eskolak, esaterako, Axularrera, Hegoldera edo Arturo Campionera. Ermitagañan «lekurik ez duten» 16ak San Juan-Ermitagaña-Mendebaldera bidali nahi ditu.

«Hezkuntza Saila merkataritza iluna egiten ari da ikasle euskaldunekin», Sortzen plataformak joan den astean kaleratu zuen agiri batean salatu zuenez. Horregatik, haurrak beren «inguru naturalean» egon daitezela, gurasoek taldeak gehitzea galdegina dute behin eta berriz. X

EAEko 600 irakasle euskalduntze prozesuan «trabatuta» daudela eta, Irale sendotzeko eskatu du CCOOk

■ Bakean eta bizikidetzaren demokratikoan oinarritutako hezkuntza galdegingo du, ohar baten bitartez

Gorane Agirre / Bilbo

EUSKAL AUTONOMIA ERKIDEGOKO (EAE) unibertsitatekanpoko irakaskuntza publikoko 600 irakasle euskalduntzeko prozesuan «ez atzera ez aurrera» daudela eta, Iraleko txandak ugaritu beharra aldarrikatu zuen CCOO sindikatuak atzo.

Irakaskuntzako sindikatuak (EILAS, ELA, LAB, UGT eta CCOO) eta Eusko Jaurlaritzako Hezkuntza Sailak 1998ko akordioaren negoziaketari ekin zioten joan den hilabetearen, EAEko unibertsitatekanpoko irakaskuntza publikoko ia 17.000 irakasleren lan baldintzak arautzeko. Biher beste bilera bat egingo

duela eta, Juan Luis Fabok, CCOOko irakaskuntzako idazkariak, bere sindikatuak planteatutako dituen eskarien berri eman zuen atzo.

Negoziaketa horietan, CCOOk —sektoreko %18,7ren ordezkaritza du— irakasleen lanordua murriztea aldarrikatuko du, enplegu sorrera bultzatzeko bide gisa. Era berean, 2000. urtean bukatuko litzatekeen klase orduen murrizketaren prozesu progresiboari ekitea proposatuko du, hau da, ordurako haur hezkuntzan eta lehenengo hezkuntzan astean gehienez 20 ordu klase emango lirateke eta bigarrenean 15 ordu.

Bestalde, soldatak ordaintzeko

sistema berri bat ezartzeko eskatuko du CCOO sindikatuak, hots, eragingarri pertsonaletan oinarritutakoa.

Irakaskuntzako aurtengo lan itunaren inguruan sindikatuak eta Administrazioak bakean eta bizikidetzaren demokratikoan oinarritutako konpromisoa hartzea galdegingo du CCOOk. Fabok azaldu zuenez, konpromiso hori testu bat sinatuz eta testu hori garatzeko batzorde bat eratuz gauzatuko litzateke.

Sindikatu horrek proposatzen duen testuan zera jasotzen da: «Bakearen eta bizikidetzaren aurkako ekintzak gertatuz gero, elkarrekin hausnarketa egingo da haiei buruz, eskubide eta

printzipio demokratikoak oinarri izanik».

CCOO oso ezkor agertu zen atzo proposatzen dituen gai horiek Hezkuntza Sailean izango duten harreraren inguruan, baina, Sailaren aldetik «aurrera egiteko borondatea» atzeman dutela onartu zuen. X

ARANZADI IKASTOLAK

Hezkuntza Bereziko irakasle laguntzaile bat behar du.

Derrigorrezkoak: Lanbide Hezkuntzako titulu egokia. Euskara ondo menperatzea.

Eginkizuna: Ikasturte bukaera arte CEldun bi ikasleren ardura bereganatzea.

Tnoak: (943)762676 edo (943)765676 - Faxe: (943)765595